



Broj: T18 0 KT 0018903 25
Brčko, 11.11.2025. godine

Optužnica potvrđena dana 13.11.2025. godine

Na osnovu člana 35 stav (2) tačka i) i člana 226 stav (1) Zakona o krivičnom postupku Brčko distrikta BiH, p o d i ž e m:

OPTUŽNICU

Protiv:

GORANA HUBIJARA, rođen 1974. godine u Beogradu, Republika Srbija,

Zbog osnovane sumnje da je:

1. Dana 12.10.2025.godine, u 02,40 sati, u Brčkom, u namjeri da za sebe pribavi protivpravnu imovinsku korist, svjestan da oduzima tuđe stvari, što je i htio, došao do ugostiteljskog objekta „Kutak”, vlasništvo A. F., koji se nalazi u ulici Miroslava Krleže broj ..., te upotrebom fizičke snage i podesnog predmeta, sistemom poluge, nasilno otvorio vrata sa zadnje strane objekta, na koji način je ušao u unutrašnjost objekta, izvršio pretres prostorija u lokalu, te iz ladice šanka oduzeo novac u iznosu od 250,00 KM, kao i neutvrđenu količinu hrane i piće, čime je za sebe pribavio protivpravnu imovinsku korist u visini od oko 3.000,00 KM, a za koji iznos je oštetio vlasnika A.F.,

dakle, provaljivanjem došao do stvari iz zatvorenih prostorija i oduzeo ih drugome, s ciljem da njihovim prisvajanjem pribavi sebi protivpravnu imovinsku korist,

2. Početkom mjeseca oktobra 2025. godine, u Brčkom, u namjeri da za sebe pribavi protivpravnu imovinsku korist, svjestan da oduzima tuđe stvari, što je i htio, došao do dvorišta porodične kuće L. A., koja se nalazi u ulici ... broj , Brčko distrikta BiH, te iz istog oduzeo muške patike marke „Solomon”, crno-sive boje, a zatim dana 13.10.2025. godine, u namjeri da za sebe pribavi protivpravnu imovinsku korist, svjestan da oduzima tuđe stvari, što je i htio, ponovo došao u dvorište porodične kuće L.A., gdje je sa terase oduzeo patike marke „Asics” plave boje, a sa štrika za veš oduzeo mušku komplet trenerke marke „Adidas” crne boje, dva muška duksa, crne boje koji nisu bili markirani, donji dio trenerke marke „Deichman”, plave boje, jedne muške crne bokserice i crne čarape, čime je za sebe pribavio protivpravnu imovinsku korist u iznosu od oko 700,00 KM i za isti iznos oštetio vlasnika L. A.,

dakle, oduzeo tuđu pokretnu stvar s ciljem da njenim prisvajanjem pribavi sebi protivpravnu imovinsku korist,

3. U vremenskom periodu od 01.09.2025. godine pa do 15.10.2025. godine, u Brčkom,

svjestan da se radi o tuđem domu, što je i htio, neovlašteno prodro u kuću vlasništvo Z. K., koja se nalazi u ulici ... broj ..., Brčko distrikt BiH, te u istoj neovlašteno boravio do dana 15.10.2025. godine kada je zatečen u kući od strane policijskih službenika Policije Brčko distrikta BiH koji su ga zatekli sa oružjem, te lišili slobode

dakle, neovlašteno prodro u tuđi dom

4. Dana 15.10.2025. godine, u Brčkom, svjestan da je građanima zabranjeno držanje oružja kategorije „B“ bez odgovarajuće isprave o oružju, što je htio, suprotno članu 7 stav (3) Zakona o oružju i municiji Brčko distrikta BiH („Službeni glasnik Brčko distrikta BiH“ broj 39/11, 2/12 i 6/13) nedozvoljeno držao pištolj marke „Walter“, modela PPK, kalibra 7,65mm, serijskog broja 382480, na kojem je ugraviran tekst „German Polizei u Dienst Automatisch Pistole“, a koji pištolj je, dana 15.10.2025. godine, pronađen prilikom vršenja uviđaja od strane policijskih službenika na krevetu u lijevom dijelu sobe u kući Zorana Kokanovića u ulici Branka Radičevića broj 33, Brčko distrikt BiH, u kojoj je Goran Hubijar neovlašteno boravio

dakle, bez važeće isprave o oružju držao oružje kategorije „B“,

čime je pod tačkama 1 i 2 učinio produženo krivično djelo – Teška krađa – iz člana 281 stav (1) u vezi sa članom 55 Krivičnog zakona Brčko distrikta BiH, pod tačkom 3 krivično djelo – Narušavanje nepovredivosti doma – iz člana 181 stav (1) Krivičnog zakona Brčko distrikta BiH, a pod tačkom 4 krivično djelo - Neovlaštena nabavka, držanje ili prodaja oružja ili bitnih dijelova za oružje – iz člana 65 stav (1) Zakona o oružju i municiji Brčko distrikta BiH.

[...]

**Ovom objavom ne prejudicira se ishod krivičnog postupka i ne narušava princip presumpcije nevinosti.
Svako se smatra nevinim dok se pravosnažnom presudom ne utvrdi njegova krivica**
